

BONERIANO

“
Mi ta arepentí
hopi biaha di
a papia, pero
nunca di keda
ketu..

BONERIANO

EDITOR:
Bonaire Communication Services N.V.

Djarsars 9 Yanüari 2024 | Preis: \$1.25

WOWO DI FALKI RIBA POLIS

Banko Maduro a bishitá promé beibi di aña



Djabièrnè 5 di yanüari Maduro & Curiel's Bank a bishitá e promé beibi di aña, kende a nase djaweps anochi i ta trata di un mucha muhé. Manera kustumber, MCB a opsekiá e beibi un bunita regalo. E pòtrèt ta mustra momentu ku Lito, huntu ku Lucy Martis-Diaz di Maduro & Curiel's Bank, a bai hasi bishita i hasi entrega di e regalo na beibi Wu, den kompania di su mama i tata.

cityshopbonaire.com

City Shop Bonaire

+599 700.6442

+599 717.3666

City Shop
Smart shopping • Better living

HUSTISIA

Kastigu abou
pa hòmer
ku a maltratá
su muhé

PAG4



2X Double Points Tuesday!
ALL DAY EVERY TUESDAY!
Earn Double Points on your Club Card

Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available

DIVI FLAMINGO CASINO

NAPA BONAIRE

BO UNIKO STOP, PA TUR
BO PIESA I TIRE PA BO
AUTO, BUS OF TRUCK

KAYA CARLOS A. NICOLAAS | 717-6272

xerox™

OBERSI
ELECTRONICS
BONAIRE

Piska den área prohibí

KRALENDIJK -- distansia, e hende ku por a mira ku ta trata di un persona outorisá pa kana den e área. Riba potrèt e persona i tambe algun flamingu pegá kuné.

Straño ku por parse, un hèngel ta piska den e área di Pink Beach, pero na otro banda di kaya, kaminda tin e bakinan di salu. E área ta prohibí i no



GRADISIMENTU I INVITASHON

Kasá, yunan, ruman i demás famia ta gradisi tur hende ku a mostra atenshon durante malesa i fayasimentu di

Edgar T. Mercera



Boso atenshon tabata un gran konsuelo pa nos.

Ta invitá na un santu sakrifisio di misa pa deskanso di su alma, djaweps 11 yanüari pa 7'or anochi na parokia San Luis Beltran na Rincon.

Aseptá esaki komo un invitashon personal.

It is with deep sadness that we herewith announce the passing of our beloved

Antonina "Annie" Anthonij

Sunrise: 05-10-1960 - Sunset: 12-30-2023

She leaves to mourn her:

Mother: Susana Leoneta

Father: Benito Anthonij

Father of her children:

Rudolph Sherwood

Sons:

Rudolph Sherwood

Randolph Sherwood

Michael Brown (US)

Considered son: Rudy Sherwood

Daughters:

Katouska Sherwood

Jessica Brown (US)

Siblings:

Felicia Placencio-Anthonij & fam

Ben Anthonij & Fam

Ivy Anthonij & Fam

Jacky Martis-Anthonij & Fam

Ramiro Anthoni & fam

Kichi Anthonij

Jacinta Anthonij & Fam

Ruth Anthonij & fam

Lientje Anthonij & fam

Rinka Anthonij & fam

Giovanni Mercera

Elio Anthonij & fam

Grandchildren:

Jahsentio & Angel Dore, Mary- Jens, Ruviana, Mikayla, Sheldon, Dornaldo, Nikayma, Randolph & Kaliya Sherwood

Close friends:

Juliana Laveist, Ruthlyn Bryan & Zenia

Close family friends: Rosemary Gladd & Wendy Marines
Nieces, nephews and family too numerous to mention.

She was related to the:

Anthonij, Leoneta, Williams, Statie, Felix, Engelhardt, Castillo, Christiaan, Janga, Offerman, Silberie, Goeloe, Placencio, Graanoogst, Martis, Joseph, Ka-laykhan, Rombley, Mercera, Martina and Sherwood families.
Big thank you to Nurses and Doctors at SMMC.

Funeral:

Wednesday, January 10th, 2023 at the Royal Funeral Home, Sucker Garden Viewing: 1:00 p.m. - 2:00 p.m.

Service: 2:00 p.m. - 3:00 p.m.

Cremation will follow after the service for the immediate family. All services entrusted to Royal Funeral Home of Crematoriun in Sint Maarten.



OPTENIBEL NA

Kuranderia popular



Natural i spiritual

Un proyekto di Unesco | FuHiKuBo

Ofisina di FuHiKuBo

Ofisina di Extra

Del Mar BV

\$17.50

WOWO DI FALKI RIBA POLIS

KRALENDIJK- “Polis ta gaña. Ora a detené mi, nan a tira mi riba suela i a usa forsa brutu. Nan a bisa pa duna nan mi telefòn sino nan ta kibra mi brasa. M’a bisa e polis e kos aki no ta legal. El a bisa e ta mata mi. Nan a pone mi kara riba betòn. Nan a choka mi na mi stròt, mi no por a hala rosea te mi a bai flou”, e sospechoso Timothy Tellez públikamente a denunciá aktitut di outoridat durante su aresto.

Awor e ta eksigí pa mira e imágennan di kámara pa proba loke e ta kategorisá komo maltrato na man di outoridat. Mientrastantu el a entregá un keho.

“Lamentablemente ainda nos no a tende nada i nos no a haña e imágennan. Wardando ketu bai”, abogado Edward Winkel a bisa. E ta representá Tellez.

Aktitut inkorekto i abusivo di parti outoridat ta keda un punto preokupante den nos komunidad. Ku wowo di falki ta sigui proseso di keho den kasonan di violensia eksesivo. Aunke no tin masha konfiansa den esaki, mirando ku ta atendé e situashon interno.

Situashon ta eskalá

Tin impreshon fuerte ku e kantidat di kasonan den kual ta kuestioná proseder

di outoridat ta oumentando. E insidente disturbante ku a sosodé durante kambio di aña na Saba, un bia mas ta demonstrá kon aktitut kuestionabel di parti outoridat ta sòru pa basta konmoshon den un komunidad. Un agente polisial opviamente bou di influensia di alkohòl a saka su arma di kandela. Tambe por a nota un funshonario di Kmar ku a involukrá den e pleitu. Awor Büró di Asuntunan Interno di KPCN i Kmar ta hasiendo un investigashon.

Aki tambe por nota ku ta vigilá e resultado di e investigashon ku wowo di falki.

E tipo di insidente asin’aki sigur ta di lamentá. Abogado Marga van Lieshout na vários okashon a advertí i desaprobá uso di violensia desporposhonal na man di polis.

Hopi bia el a boga pa e tópiko aki haña su debido atenshon. “Polis ta prepará pa hustamente de-eskalá un situashon. No ta tur polis pero tin ku ta hasi maluso. Si no hasi nada, bo ta krea mònster”, el a splika durante un previo entrevista.

Ainda ta fresku den memoria e insidente den kua un polis na un manera bastante brutu a pusha un repòteru ku

konsekuensia ku esaki a kai riba suela. Despues di un investigashon a resultá ku e polis a aktua segun protokòl di KPCN. “OM a manda e kaso pa Reclasing. Nan ta pone preshon pa ami bai di akuerdo pa mediashon. Ami ke pa KPCN atmití ku nan a faya i paga mi daño i perhuisio”, Tico Janga a splika BONERIANO.

No opstante tur esaki KPCN ta haña importante pa komunidad su konfiansa den polis keda stabil. “P’esei nos prosedura di keho ta asina importante i nos ta tuma e señalnan di komunidad na serio”, KPCN a bisa durante un previo entrevista.

Pastor kontroversial kulpá di violashon di su siguidónan

KRALENDIJK/NIGERIA -- E kontroversial pastor T. B. Joshua, a abusá seksualmente di miembronan di su iglesia pa kasi binti aña. E emisora Britániko, BBC, ta informá despues di un investigashon di dos aña. E influyente Josué a keda kritiká mas tantu den pasado pa su kurashonnan. El a muri na 2021.

BBC a papia ku un

kantidat di èks miembro di Iglesia Sinagoga di tur Nashon, di kua Joshua tabata e fundadó. Tur hende a bin na e metrópolis Nigeriano di Lagos pa topa ku e evangelista. Hulandesnan tambe a biaha pa Nigeria pa eksperimentá nan durashon di aserka.

Joshua a deklará ku e por kura entre otro kanser i aids.

Un di su víktima ta e Britániko Rae. E ta

konta e stashon kon el a keda den iglesia komo disípulo skohé pa diesdos aña. Nunka Rae tabatin intenshon di keda Nigeria pa asina hopi tempu. El a studia diseño na Universidat di Brighton i tabatin un bida di divershon. Te na 2002, el a disidí di buska e hòmer konosí pa su podernan kurativo. E siguiente tabata un invierno.

Joshua a abusá di Rae seksualmente severamente, kende a afirmá di a hasi vários intento di suicidio. Durante dos di e diesdos añanan ei, el a keda den karentena solitario. Esaki ta un storia di teror, e muhé a bisa BBC.

Abuso

Un muhé di Namibia tambe ta bisa ku Joshua a

viol’é. Segun e repòrtahe, Jessica Kaimu a sufrí sinku aborto foroso durante su tempu den misa. E ta deskribí esaki komo intervenshonnan di porta será, den kua e por a muri.

Ademas, e muhé ta konta ku e mester a kita sunú regularmente, solamente pa keda abusá ku kabel di heru. Tambe nan a tene e muhé lantá pa oranan largu.

Vários persona ku a konta nan historia, ta deskribí e iglesia komo un kulto. Tur hende ku a purba di bati e alarma, a keda tratá fuerte. Vários persona ta bisa ku nan a keda ataká físikamente despues di a denunciá abuso òf agreshon via YouTube. Un di nan a asta bisa ku a tir’é.

BBC tambe a

eksperimentá esaki riba su mes, ora ku a purba di filma e iglesia na 2022, for di e kaminda públiko. Agentenan di siguridat di iglesia a tira riba e periodistanan i a detené nan pa vários ora.

Kuater Britániko afiliá na e iglesia, a denunciá e violashonnan na e outoridatnan Britániko. Nan ta bisa ku nunka no a tuma medida.

Iglesia Sinagoga di tur Nashon ta aktivo te awe, tin siguidónan rònt mundu i ta operá un kanal di televishon. BBC a purba di haña un historia di iglesia, pero den ningun kaso a kontestá. Sinembargo e iglesia a bisa anteriormente ku nunka no a fundá ningun akusashon kontra Joshua.

(Fuente: NOS)



HUSTISIA



Kastigu abou pa hòmbler ku a maltratá su muhé

KRALENDIJK- Korte den Promé Instansia a kondená Eziquias B. (43) na un kastigu di prizòn di 2 siman kompletamente kondishonal ku un periodo di prueba di 1 aña.

Hues a konden'é pa maltrato di su pareha. "Bo ta haña un kastigu mas abou pasombra ya e kaso ta bieu", hues a splika.

Ministerio Públiko a akusá B. di 2 echo kastigabel, ámbos maltrato. Fiskal Trisha Keller a representá OM i abogado Van Lieshout a hiba e defensa. B. a presensia su huisio via konekshon di vidio for di prizòn na Sittard, Hulanda.

E ta enkarselá aki pa un otro delitu. "Mi ke pa suspend'é e kaso pasombra mi no a haña chèns di papia ku mi abogado. Dos pa tres ora pasá a bisa mi di e kaso awe", B. a bisa.

Hues tabata determiná pa atendé e kaso mirando ku ya a suspend'é kaso 2 bia kaba.

Hues a pidi tur hende pa bandoná sala di korte pa e sospechoso haña chèns pa papia ku su abogado.

Dosié penal

Segun e dosié penal 6 di yüni 2021 e muhé R. a yama polis i a bisa ku B. tabatin e será den kas pa 3 dia i a maltrat'é i a viol'é. Sinembargo e no a hasi denuncia. Seis luna despues, riba 19 di novèmber 2021 R. a bolbe yama polis i aki sí el a hasi denuncia. El a deklará ku nan tabatin pleitu tokante un fèn. B. a rank'e na su kabei i a tir'e riba suela. Aki B. a skòp e den su kara i na su repchi. "Tin un deklarashon médiko ku bèrdat e tabatin herida na su kara i den su lomba. Kon el a yega n'e heridanan?", hues a puntra.

"Wak, p'esei mi a bisa ku nos a pasa hopi kos huntu i mi no ke hink'e den problema. Pero e mes ta heridá su mes", B. a kontestá. "Den su lomba tambe?", hues ta kuestioná.

"Si, e por dal den algu. Bo mester puntra R. mes. Ami no ta deklará kontra dje", B. a bisa. E sospechoso a insistí den su inosensia i a bisa ku R. tin algun problema mental i ta inventá sierto senario. Tambe ku ainda nan ta den

un relashon amoroso ku otro. Segun B. e ta serka di rekobrá su libertat i mesora e ta regresá Boneiru pa biba ku R. Abogado van Lieshout a entregá komo prueba un dokumentu di Mental Health Caribbean (MHC) deklarando ku R. su relashon parse stabil na e momentu aki i nan tin nan yunan bèk na kas. Tambe ku R. tin posiblemente trastorno di personalidad.

Kaso bieu

Pa fiskal e akusashonnan ta probá pero e ta tene kuenta ku basta tempu a pasa. "Alabes mi ta haña ku e ta meresé kastigu. E no ta tuma responsabilidad, i ta tira tur kos riba R." OM a demandá un kastigu di prizòn di 20 dia kompletamente kondishonal ku un periodo di prueba di 2 aña.

Abogado defensor a kuestioná e investigashon den e kaso aki. Korte den Promé Instansia a apsolvé Eziquias B. di e promé akusashon. Sí, hues a haña B. kulpabel di e segundo echo di maltrato di su pareha.

Detenshon pa manehá fuma

KRALENDIJK -- Den oranan di anochi djadumingu 7 di yanüari, alrededor di dies pa nuebe, Polis a detené e hòmbler di inisial W.R.J.t.W. di 43 aña di edat pa manehá bou di influensia di alkohòl.

E sospechoso tabata kore zeilu riba Kaya Ing. Stadius van Eps, bayendo den direkshon di Belnem. Un outo di servisio di polis ku tabata bini for di direkshon kontrali a trata na desvia pa un aksidente frontal, pero e vehíkulo ku tabata aserkando a dal ku

su spil, den e spil na banda robes di e outo di polis i a sigui kore.

E patruya a lora bai su tras i a duna e shofùr òrdu pa para. Despues di un investigashon a resultá ku e tabata bou di influensia. A hasi un tèst di supla ku e shofùr i a deten'é pa manehá bou di influensia di alkohòl.

A transport'é pa Warda di Polis pa un análisis di rosea i a konsekuensia di e resultado di esaki a konfiská su reibeweis.

Diferente but pa violashon den tráfiiko

KRALENDIJK -- Entre djaluna 1 di yanüari i djaluna 8 di di yanüari, Polis a duna diferente but pa violashon den tráfiiko durante kòntrolnan rutinario.

Ta trata di but pa manehá reibeweis bálido, manehá sin hèlm bistí, manehá sin seguro bálido, manehá sin faha di seguridat bistí

i pa tene telefòn den man miéntras ta manehá.

KPCN ta hala atenshon di un i tur pa nan tin e dokumentunan nesario na òrdu.

Tambe ta konsehá estriktamente pa kumpli ku e reglanan di lei di tráfiiko. Ku esaki bo tambe ta kontribuí na un tráfiiko seif i sigur riba e isla.

Outo ta dal den pilá

KRALENDIJK -- Den oranan di mardugá djaluna 8 di yanüari, alrededor di 2'or, un aksidente a tuma lugá riba Bulevar Gobernador Debrot.

Na yegada di e patruya, a resultá ku shofùr di un outo ku tabata bini for di Playa, bayendo den direkshon Hato, probablemente pa motibu di velocidat haltu, a pèrdè kòntrol riba su stür den un bògt i a dal den un pilá.

Un marka di brek largu tabata visibel riba kaminda loke ta indiká riba velocidat haltu di e

outo.

A hasi un tèst di supla ku e shofùr i a resultá ku e tabata bou di influensia di alkohòl.

Pa motibu ku e shofùr a resultá heridá i ku ambulans mester a transport'é pa hòspital pa tratamentu médiko, no a deten'é pa manehá bou di influensia. Despues a resultá ku e no por a mostra un reibeweis bálido na kua el a hasi su mes kulpabel pa manehá sin reibeweis. Pa esaki el a haña un but.

(Foto: LIVE 99.9FM)



Wietze de Jager ta emigrá pa Boneiru

KRALENDIJK – Oyentenan di Radio 538 mester hasi esaki sin e stèm di Wietze de Jager. Un bosero di e stashon di radio a anunsiá ku el a terminá su kontrakt.

“Nos ta agradesidu pa e añanan ku el a forma parti di Radio 538 i nos ta dese’ é hopi éksito den su futuro karera.”

Riba Instagram, de Jager ta anunsiá ku e ta emigrá pa Boneiru ku su famia. “Algún di nan

tabata riba e bon kaminda, pero awor ofisialmente Boneiru ta,” e ta skirbi.

Ya ta vários luna for di e último biá ku a tende su stèm na e stashon di radio. Aña pasá de Jager a haña difikultat pa kombiná su trabou ku su bida privá.

De Jager a anunsiá na òktober ku el a bira tata pa di kuater biá, di su yu Leo.

E DJ di radio i su kasá, Lieke Veld, tabatin dos yu anteriormente, Kees

Valentijn i Harm-Adam i nan yu muhé Juul Bettie.

Na òktober, de Jager i Klaas van der Eerden, a konkluí nan último programa di mainta na Radio 538 ku un sentimentu positivo. “Nos ta papiando di futuro, pero esei sigur lo funshoná,” el a primintí e oyentenan.

Pero e ta parse di ta kibrando e promesa ei.

(Fuente: De Telegraaf)



**Nos ta habri 2024 ku e bon notisia ku a oumentá despues di 13 aña e mínimo sosial na un montante ku ta garantisá derecho di eksistencia di nos hendenan ku pa kualkier motibu mester haña sosten sosial i tambe pa nos penshonadonan ku solamente tin ku biba di penshun di behes por tin un entrada na drechi. Un pabien ta na su lugá na e klase trahadó ku tambe a risibí un oumento di nan suèldu mínimo entrante yanüari aki i ku na yüli lo bolbe oumentá, miéntras ku a subi e plafòn di paga belasting di tal forma ku henter e klase trahadó lo ta bai tin probecho finansiero di esaki.

Ku e oumentonan aki a drecha e forsa di kompra di tur hende ku ta bai ta na benefisio di nos ekonomia interno ya ku ta bai tin un volúmen mas grandi di sèn ta lora den nos ekonomia.

Pero apesar di e bon notisia aki ketu bai nos ta lesa ku lo ta oumentando preisnan eksageradamente i ta usa komo argumento ku e oumento di preis di produkto i servisionan ta debí na e echo ku

Nòchi Willem, konsehero di Union Sindikal Boneriano, USIBO

Sindikalismo na Boneiru(1)



entrante yanüari 2024 ta oumentá suèldu mínimo. Sindikalismo for di momento ku a bira konosí ku lo oumentá suèldu mínimo na luna di òktober 2023 a atvertí kontra loke sindikalismo a yama e lobo den kueru di karné. E lobo ta e sistema ku sierto komersiantenan lo a bai usa pa hustifiká oumento di preis, hasta promé ku a subi e suèldu mínimo. I den esaki nos a bisa ku gobièrnu di Boneiru tin un papel importantísimo pa hunga.

Na promé lugá e echo ku nos ta un isla ku ta dependé pa 99.9% di importashon, gobièrnu mester a kordiná un reunion ku tur e importadónan pa asina yega na un konsenso pa loke ta trata manehá e kosto di importashon. Si den e komunidad chikí aki tin suficiente plaka ta lora pa hasi 20% di nos ko-siudadanonan biba den luho i kómodo, pues simplemente biba den rikesa, mester tin espasio pa huntu nos krea un sosiedat hustu, kaminda

ta repartí e rikesa aki den un forma ku e 80% sobrá tambe tin un bida digno.

Na di dos lugá gobièrnu ta e úniko instansia ku legalmente por aktua si e tuma nota ku e desaroyo di preis ta bai den tal direkshon ku e ta afektá e interes general. Gobièrnu na nos pareser no por hiba un maneho asina liberal ku e ta laga e merkado completamente den man di e aktornan i spera ku e merkado lo regulá su mes. I pa por atendé ku un situashon asina, gobièrnu tin algun instrumento legal ku e por aktivá. Nan ta entre otro leinan ku ta atendé ku preis di e produkto, leinan ku ta atendé ku peso i deskripshon di e produkto.

No ta pa loko gobièrnu ta bai mete, pero si e oumento di preisnan ku ta tumando lugá no tin hustifikashon ophetivo, na opinion sindikal, gobièrnu tin e deber di intervení. I pa yega na un opinion ophetivo den esaki, gobièrnu ta disponé di un servisio di

asuntunan ekonómiko ku por analisá i evaluá henter e proseso di pone preis pa produktonan riba nos isla. I ku esaki ta posibel nos ta eksperensia den kaso ku mensualmente gobièrnu ta publiká preisnan di produktonan petrolero, manera gasolin, diesel, kerosin i gas pa kushiná tantu por mayor komo por detal.

I pa loke ta en todo kaso e produktonan for di e makutu básiko gobièrnu mester por hasi e mesun ehersisio aki sin ningun problema.

Huntu ku esaki gobièrnu mester eksigí ku riba tur produkto ta pone e preis i si ta produktonan ku ta pone preis a base di peso, mester indiká e peso. I hopi importante ta tambe ku unaves e instrumentonan aki ta na vigor, gobièrnu mester pone supervishon pa tur esnan enbolbí mantené nan mes tambe na e desishonnan aki.

Banda di e responsabilidat legal aki, kada konsumidó riba su mes tambe tin su propio

responsabilidat pa manehá su presupuesto den un forma korekto. Den esaki e ta haña yudansa di parti di e Fundashon Tienda pa Konsumidó ku ta publiká regularmente un lista di produktonan di diferente establecimiento di moda ku e konsumidó por kompará na unda e por kumpra mas barata i mas kunbiniente.

E konsumidó tin un kantidat di derecho mas ku na momento ku e konstatá ku tin violashon di esakinan, e mester denunsiá nan sin miedu pa asina outoridatnan kompetente por korigí mesora. Tambe e organisashon UNKOBON t’ei pa sali na interes di konsumidónan i a publiká su punto di bista pa loke ta e asunto di preisnan aki na Boneiru.

Pues pa nos komunidad funshoná den un forma hustu, tur e aktornan mester traha integralmente huntu i karga e responsabilidat aki. Al fin al kabo si Boneiru bai bon e ta bai bon pa tur hende, pero si e bai malu ta esnan ekonómikamente suak lo risibí e sla di mas duru.

Enkuesta di JCI YUB

KRALENDIJK -- JCI YUB primeramente ke deseá e pueblo di Boneiru un felis aña 2024, yená ku dicha i prosperidat.

Den 2023 JCI YUB a reafiliá su mes na JCI

Dutch Caribbean di kual aki tur kos a ranka sali pa ku JCI su eksistensia bèk na Boneiru. Resientemente JCI YUB a publiká un enkuesta ku e meta pa sondia e interes

den e grupo di enfoke ku ta hóbennan di 18 pa 40 aña i alabes inventarisa kiko ta e preokupashon i problemátikanan ku pa e grupo en kuestion aki ta rekerí atenshon i akshon

pa mehorashon.

JCI ta un organisashon ku su meta ta pa duna un empuhe na adelanto di un pais kresiente, JCI YUB

ta sinti su mes yamá pa skucha kiko ta e nesesidat promedio di e siudadano Boneriano.



Let's grow Bonaire together with one vision

* Indicates required question

Email *

Your email

Bo ta miembro di JCI YUB? *

- Si
 Nò

Wingcheung Supermarket

ta buska

1 Allround medewerker

-mester tin mas ku 1 aña di eksperensia den e trabou aki

Pa mas info yama # **795-2115**

AKTO DI KARIÑO

Skritura: Hebreonan 11:32-40

"I sin fe ta imposibel pa agrad'E, pasobra esun ku bin serka Dios mester kere ku E ta, i ku E ta Esun ku ta rekompensá esnan ku ta busk'E." Hebreonan 11:6(BS)

Ki dia tabata e último biaha ku bo a hasi un akto di kariño? Kiko bo ta konsiderá un akto di kariño? Tin hende a rekonosé bo pa un akto di kariño ku bo a hasi? Akto di kariño por ta algu ku abo ta konsiderá chikí i insignifikante; e por sosodé diariamente i ningun hende mester a mira. Manera: duna un glas di awa, habri porta pa duna preferensia, hasi limpiesa pa un mayor di edat, duna bo asiento na un otro, etc. Un akto di kariño ta agradá Dios ora e ta sali di un kurason sinsero i ku fe, sin ferwagt ningun rekompensa. Ku e aktitut ku Dios ta mira i ta bendishoná na Su tempu.

Hebreonan 11:1 ta bisa ku fe ta e konvikshon di kosnan ku hende no ta mira. Hopi biaha komo hende nos ke mira pa nos kere. Ma realmente nos mester biba ku e konvikshon ku Dios so ta mira tur kos i ta rekompensá. Hende por mira i nan por rekonosé loke bo a hasi, ma e rekonosementu akí ta temporal.

Hebreonan 11 ta konfirmá akto di diferente persona ku kisas no a keda rekonosé pa loke nan a hasi aki na mundu; ma Dios ta sigurá ku El a mira i lo rekompensá.

Na ken bo a muestra un akto di kariño awe? Sabi sigur ku Dios a mira!

Gilda Beukenboom-Sintjago

Produkshon PGM

Programanan di Bonaire.tv

TELBO kanal 70

Flamingo TV kanal 23

Djammers 9 Yanüari 2024

12.00 Herensia Pana:	Egbrecht (Su bida)
13.00 Aki Boneiru:	Familia Pourier
14.00 Herensia Aruba:	Hubert Cornelis Naar
15.00 BAPA:	Equador 2
16.00 Aktualidat:	Bart van Oost
17.00 Aki Boneiru:	Wilbert Josephia
18.00 Herensia:	Isistra Molina
19.00 BAPA:	Corrine & Germaine Hernandez
20.00 Apel di Oro:	Episodio 13
21.00 Dokumental:	Telbo
22.00 Herensia:	Manchi Provence
23.30 Puerto Latino:	Luis Zárraga

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.



Presidente Mesa di Klima ta laga urgensia warda riba dje

KRALENDIJK – Ainda semper no tin presidente pa Mesa di Klima Boneiru. Na aprel i Minister di Klima, Jetten i Kolegio Ehekutivo di Boneiru, abrasa e konseho di Kwartiermaker Ed Nijpels, pa tuma e konsekuensianan di kambio di klima na serio. Ku esaki Mesa di Klima mester yena un ròl importante, pero e palabranan di e gabinete i Gobièrnu insular te ku awor, no a kondusí na echonan. Di e proponementu lihé di un presidente pa Mesa di Klima, nada a resultá.

Entretantu e pasenshi di Greenpeace a kaba. E organisashon, huntu ku un kantidat di habitante di Boneiru, na mei a urgi

Estado Hulandes pa hasi lihé pa tuma medidanan di protekshon.

Sin aktua e parti sùit di e isla medio e siglo akí ainda ya por ta víktima di subida di superfisie di laman. Kombersashonnan di esnan ku a hasi a petishon i e mandatarionan enbolbí, no a kondusí na resultadonan konkreto.

Dj a d u m i n g u Bonerianonan a demostrá bou di e bandera di Greenpeace na Te Amo Bich pa hustisia pa klima. Djaweps ta sigui un konferensia di prensa durante kua lo anunsiá pasonan mas aleu. Un petishon riba e web-site di Greenpeace, entretantu a keda firmá pa kasi 20 mil biá.



Bonaire Marine Center tin doño nobo

KRALENDIJK – Bonaire Marine Center tin doño nobo. Buddy Leijnse i su kasá, Nadeche, awor ta manehá e kompania.

Dia sinku di yanüari e doñonan nobo a tuma Bonaire Marine Center over for di Louis Posner i su señora.

Posner i señora ta retirá

– despues di basta aña di trabou duru.

Bonaire Marine Center ta eksistí pa 13 aña kaba i ta diler ofisial di motor di boto Suzuki. Nan tin piesa tambe pa boto i trailer.

Bonaire Marine Center ta spesialisá den service boto. Nan ta habrí di djaluna pa djabièrnè, di 8'or di mainta

pa 5'or di atardi non stòp.

Bonaire Marine Center tei pa sirbi e pueblo di Boneiru kompletu ku produktonan di kalidat.

Pa kualke problema ku boto, òf pa mantenshon i servisio di boto, nan ta spesialisá den esaki ku mas di 13 aña di eksperensia.

(Fuente: LIVE99FM)



Yuda nos tene nos playanan limpi



extra
...number 1

www.extraboneiru.com

BERBOU B.V.

ta buska

4 timmerman

Pa mas info yama # **777-8777**

Rincon City Supermarket

ta buska

1 supervisor

-mester tin mas ku 1 aña di eksperensia pa e funshon aki

Pa mas info yama # **795-2115**

UNTAHF ta lamentá morto di èks Rei di Tumba Eddy Melaan

KRALENDIJK -- Direktiva di Fundashon Union Ta Hasi Forsa (UNTAHF), ke para ketu na e fayesimentu repentino e fin di siman ku a pasa di e konosido Eddy Melaan.

Eddy tabata hopi konosí komo músiko, kantante,

kompositor i areglista i ku tabata dominá un variedat di instrumènt.

Durante su karera farandulero, Eddy tabata aktivo kantando i tokando den práktikamente tur género musikal.

E temporada ku nos a

kaba dreña aki di karnaval, ta pone ku ta djis menshoná ku desde e promé añanan di eksistensia di Festival di Tumba na Boneiru, Eddy a tuma parti na numeroso okashon di e evento, kual tambe a hib'é na un total di tres título komo Rei di

Tumba.

Esakinan tabata na 1988 ku At'e Kachimba Dal un Trèk, huntu ku Típiko Boneriano, 1992 Dun'é Espasio Hala P'e Pasa, huntu ku Orkesta Imass i 2013 ku Mandato

di Kurason, huntu ku Happy Band. Direktiva di UNTAHF' ta manda palabranan di kondolensia na esposa, yunan, rumannan i tur demas famia i konosí di Eddy Melaan.

Eddy sosegá na pas.

Proyektonan duradero di naturalesa tin mester di solushon spesífiko

KRALENDIJK -- Den un simposio resien riba solushonnan basá riba naturalesaparestourashon di ekosistema, Arno Verhoeven, di e aliansa Hulandes di naturalesa di Karibe, DCNA, a presentá ehèmpel di proyektonan di restourashon di naturalesa na Karibe Hulandes. E proyektonan, ku ta varia for di esfuersonan komunitario na Sint Eustatius te ku mapa stratégiko di koral na Sint Maarten, ta duna informashon riba e diversidat di konservashon i restourashon ambiental den e region.

E proyektonan ta enfatisá e enfokanan úniko di kada isla.

Na Sint Eustatius, atenshon ta konsentrá riba agrikultura sostenibel i mehorashon di e paisahe. Ademas di planta palu, Statia a envolví su komunitat kompleto den un iniciativa pa restorá e ekosistema.

Statia ta trahando aktivamente pa eradiká espezies invasivo pa protehá i revitalisá habitatnan krítiko i tambe pa protehá espezies krítiko, manera e paloma grandi 'kwartelduif'.

Kòrsou

Kòrsou ta enfoká riba revitalisá áreanan

Sint Eustatius



akuátiko históriko i un biberu di matanan nativo, Savonet.

E ta sirbi tambe komo un sentro di investigashon. Aki atenshon ta riba e transformashon di simia den matanan hóben resistente.

Riba henter e isla, e proyekto 'Awa pa Kòrsou' ta trahando pa revitalisá basenan hidrográfiko históriko, inkluyendo damnan i posnan bieu, pa mehorá e maneho natural di awa riba e isla.

Otro islanan

E proyekto ReLeaf di Saba ta enfoká riba restorá espezies i Aruba i Boneiru ta komprometé ku restourashon di palu di mangel. Sint Maarten ta enfoká riba mapa di ekosistema di koral i di kosta pa strategianan di rekuperashon di rekuperashon.

E proyektonan akí ta un paso importante den interkambio di konosementu i eksperensia entre e islanan, kontribuyendo na desaroyo di solushonnan efektivu i sostenibel pa problemanan ambiental.

Probechando e eksperensia lokal i trahando huntu, e islanan Karibense Hulandes ta promové konservashon di naturalesa i resiliensia ekológiko den e region.

(Fuente: Bonaire.nu)



Esmeraldo George den Herensia

KRALENDIJK – Djárason awor 10 di yanüari Nicolaas Esmeraldo George ta den e programa Herensia na Bonaire.tv. E ta biba na Kòrsou aktualmente, pero nasé i lantá den e bario Anriol na Boneiru. Den dianan di fin di aña e tabata riba su isla natal i a invit'é pa papia di su bida i karera den Herensia. Esmeraldo su mayornan tabata Mon i Chechi George-Nicolaas. Esmeraldo ta papia di nan, tambe di su wela, mama di su mama,

Konchon Nicolaas, un persona markante ku a biba mas ku 100 aña. Hopi konosí Esmeraldo a bira komo partidó di korant na Boneiru. E tabata e promé persona riba e isla ku a kuminsá ta parti korant riba bròmer. El a parti Amigoe pa hopi aña. E programa Herensia ku Esmeraldo George ta kuminsá pasa pa 12'or djárason mèrdia ku ripitishon djaweps 4'or di atardi i djabièrnè 8'or di anochi na Bonaire.tv, kanal 70 di Telbo i 23 di Flamingo TV.



Banko Maduro a bishitá promé beibi di aña

KRALENDIJK -- Boneiru a konosé su promé beibi di aña ku a nase dia 4 di yanüari, eksaktamente sinku pasá di dies di anochi i a pisa 3310 gram i midi 49 centimeter.

Ta trata aki di un mucha muhé.

Manera kustumber, Maduro & Curiel's Bank (Bonaire) N.V. a bishitá e promé beibi di aña i a opseki'é un bunita regalo.

Gerensia, staf i personal di Maduro & Curiel's Bank (Bonaire) N.V., ta felisitá e mayornan i deseá famia Wu

Liang hopi felisidat huntu ku nan beibi.

Pòtrèt ta mostra momentu ku Lito, huntu ku Lucy Martis-Diaz di Maduro & Curiel's Bank, a bai bishitá i hasi entrega di e regalo na beibi Wu, den kompania di su mama i tata.



Bart van Oost den 'Aktualidat' tokante su buki **Misterio di 'De Gouden Verrader' revelá**

KRALENDIJK -- Eskritor Bart van Oost ta sigur ku el a logra revelá e misterio di 'De Gouden Verrader'. Den su buki ku lo keda presentá e fin di siman benidero den sala di FuHiKuBo, Bart van Oost ta duna e evidensianan ku 'De Gouden Verrader' ta bini di e barku Mari Bahn ku a senk na kosta di Karpata mas ku 110 aña pasá.

'De Gouden Verrader' òf 'The Golden Traitor' ta un imágen di hende muhé ku tabata pegá na e bug di un barku. Diferente persona, manera LD Gerharts i tambe pastor Nooyen, a indiká ku e imágen aki tabata bini di un barku ku a noufragá riba e islanan Aves pariba di Boneiru.

Bart van Oosten den su buki 'De Gouden

Verrader van Bonaire', sostené pa evidensia, ta muestra ku e vershon ei no ta korekto. E ta kere ku e imágen aki ta bini di e barku Mari Bahn, di kua barku su foto ta ilustrá kaft di e buki.

Pa hopi aña e imágen a keda den lantshùis Yato Bako, for di unda LD Gerharts a bai kuné. El a keda montá na e bar di Hotel Zeebad, for di kua marinirnan a 'hòrt'é', pero a tres'é bèk a kambio di un trit di serbes di parti doño di Zeebad.

E 'hòrtamentu' òf 'sekuestro' aki di 'De Gouden Verrader' a bira un tradishon.

Den e programa 'Aktualidat' ku ta pasando for di djaluna na Bonaire.tv Bart van Oost ta papia di 'De Gouden Verrader'.



BOEK-
PRESENTATIE

Bart van Oost

Op 12 januari is het eindelijk zover! Dan verschijnt het historische debuut van Bart van Oost. Deze gebeurtenis willen we uiteraard graag vieren en dat doen we met een boekpresentatie bij, hoe kan het ook anders, de Gouden Verrader zelf! Met haar duiken we terug in tijd naar precies 150 jaar geleden!

12 januari 2024 | vanaf 18:30 | FuHiKuBo

Kaya Irlanda 12 Kralendijk, Bonaire RSVP voor 3 januari via de knop in de mail of via info@caribeebooks.com, want VOL = VOL



Pronóstiko di tempu pa Boneiru

Djaluna 08 te Djammers 09 Yanüari 2024
Prinsipalmente mañan chèns pa un áwaseru

Ta leve te parsialmente nublá i prinsipalmente mañan tin chèns pa algun áwaseru. E temperatura máksimo lo ta aproksimadamente 31°C, e temperatura mínimo mas o ménos 27°C. Bientu for di di-rekshon ost ta basta fuerte te fuerte, forsa 5 te 6.

Altura di ola: aproksimadamente 2.5 m (6-8 pia), ku lo oumentá mañan te 2.5-3.0 m (7-9 pia)

* Altura di ola válido pa laman grandi

Nos ta changá

Hustisia pa klima awor

KRALENDIJK -- Djadumingu Green Peace a organisá un aktividat ku a karga e nòmber 'Pueblo riba pia'. Un manifestashon ku a tuma lugá na Te Amo Bich pa hustisia pa klima.

Na e sitio durante e manifestashon hendenan tabata bisa na bos haltu: "Nos ke awor hustisia pa kambio di klima."

Notabel mas tantu Hulandes Europeo ku e hende lokal. Polis tabata presente i tambe bai bini den e área ku outo. Sinembargo

e manifestashon tabata tranquil.

Algun di e remarke nan na e sitio riba esenario tabata: "Di e manera akí nos ta kuminsá e kampaña pa mehorá e kayente ku nos ta den dje. Nos manera di pensa i hasi, huntu nos mester hasié pa nos logra."

"Kiko nos ke hustisia pa klima awor. Nos ta changá, nos tur ta changá. Mi no ke bai biba otro kaminda. Djaki mi ta, djaki mi ta biba. Awa a yega te na mi lep. Hulanda mester duna

atenshon awor. Mi ke bisa hóbennan, wak kon bo por duna bo aporte pa yuda nos tur. Nos mester di yudansa pa e isla aki."

Onnie Emerenciana di Green Peace. "Hopi palabra bunita ta bin dilanti, pero no ta hasi nada. Na 2050 ke hasi algu, ya ta lat, pasobra kos ta bai sosodé promé ku e tempu mensioná. Mi ta kunukero, mi ta planta hopi kos, pero nan no ta nase, pasobra e temperatura ta muchu kayente. Meskos STINAPA ta kuida, pero



debí na kambio di klima, e laman tambe ta kayente i nan por yuda ku e situashon. Pero no ta hasi nada. Si keda di e manera akí, despues di poko tempu, Boneiru no tei mas.”

Emerenciana a sigui bisa, awor nos ta bai den grandi. Sí e parti sùit bai bou di awa, e ta afektá henter Boneiru.

Nos mester bini dilanti awor. Ora a papia ku

Hulanda, ta bisa kosnan ta den proseso, pero nada mas. Notabel hopi koral a kuminsá muri. Ta esei ta nos kos ku ta atraé turista pa nos tin entrada.

Hopi hende a bin biba na Boneiru i e Boneriano mes a bira tiki. Tabata deseá pa nos yega 25 mil hende. Nos a yega e kantidat, ken ta stòp e kresementu awor.

Nos isla ta esun mas limpi den Karibe, pasobra nos ta

kuida. Nos no por evitá ku e laman ta kayente, esei ta larga, Emerenciana a bisa.

Emerenciana: “Nos di Green Peace a pone atenshon pa hisa suèldu mínimo i esei a sosodé. Nos ta bai Korte ku Hulanda.

No ta importá ku nos ta chikitu.

Nos a demostrá kaba ku nos ta chikitu i kaminda nos tin rason, Hulanda mester aseptá.”



BONERIANO
 EDITOR: Media Communication Services N.V. | Djaweps 11 mei 2023 | Preis: \$1.25

AMTENAR NO TIN RESTRIKSHON PA MANIFESTA

Pa aviso i komunikado den Extra/BONERIANO
 Redakshon: extrabon@gmail.com
 Aviso: avisobon@gmail.com

Pa mas informashon por yama nos libramente na 717-8482

BONERIANO e korant mas lesá aki na Boneiru!

PIESA I TIRE PA BO AUTO, BUS OF TRUCK

WAPA

CARD

Ingemar de Jesus a hasi aña

KRALENDIJK -- Ingemar de Jesus a kumpli 1 aña mas di bida i el a invitá tur amigu ku ta kore motosaikel, pa selebrá huntu kuné.

Nan a reuní djadumingu ku a pasa i sali kore parti sùit di Boneiru, despues pasa na pista pa pone fever na Onima.

Finalmente despues di pasa den algun bario,

nan a regresá kaminda nan a kuminsá na Kaya Nikiboko Nort.

Tur hende a kome, bebe i gosa di e anochi, sera siman huntu ku Ingemar. DJ MC Tem, ta un di esnan ku a pèrkurá pa bon ambiente e anochi.

Potrèt ta ilustrá e amigunan di Ingemar riba motosaikel i momentu ku e tabata kla pa bai kòrta e bolo den su man.



Penel porta avion Alaska Airlines haña den kurá di kas

KRALENDIJK/ PORTLAND

Investigadónan a haña e penel di e porta di e avion di Alaska Airlines ku tabata mester pa hasi un aterisahe di emergencia djadumingu den kurá di kas di un dosente na Portland. E Boeing tipo 737 Max 9, a pèrdè e penel di porta mas o ménos 35 minüt despues di a lanta. E penel por duna indikashon di kon kosnan por sali malu durante e buelo.

E avion di pasahero tabata dirigiendo for

di Portland, Oregon, pa un aeropuerto serka di Los Angeles. Poko despues di a lanta, el a bolbe Portland. E avion por a aterisá seif ku 171 pasahero i 6 tripulante abordo. Ningun hende a resultá heridá.

Na e lugá di e avion kaminda e penel tabata, normalmente tin un penel ku e fabrikante di avion Boeing ta pone einan pa kubri un salida di emergencia ku e kompania di aviashon no ta usa.

E penelnan ta den hopi

avion 737 Max 9, pasobra mayoria di kompania di aviashon no ta usa e salida di emergencia. E ta trata di e kantidat di asiento. Kompanianan ku pone mas tantu asiento posibel riba nan avionnan, ta obligá pa usa e pasarela di emergencia adishonal. Esaki ta konta pa Corendon na Hulanda. Otro kompania Europeo tampoko no tin e penel akí.

Lus di advertensia

Alaska Airlines a disidí e dia promé di e insidente

pa stòp di usa e avion en kuestion pa buelonan pa Hawaii, pasobra un lus di advertensia a keda aktivá riba tres buelo anterior. Esei tabata un problema ku preshon den e avion, un ofisial Merikano a bisa djadumingu.

Asina Alaska Airlines tabata ke pa e avion sigui bula riba tera pa e por a regresá lihé na un aeropuerto den kaso di problema. E hunta nashonal di seguridat di transporte, ku entre otro ta dediká na investigá aksidentenan aéreo, ta bisa ku e lus di advertensia posiblemente no tin nada di aber ku e insidente.

Den e investigashon di e insidente, investigadónan no por usa grabashonnan riba e

grabadó di bos di e avion. E ekipo di grabashon no a keda pará i ta keda reskribí outomátikamente despues di dos ora. Investigadónan no por a sigurá e grabador durante e tempu ei.

Avionnan na tera

Despues di e insidente, Alaska Airlines ta mantené tur su 65 avionnan Boeing 737 Max 9 na tera. E avionnan ta keda inspekshoná i mantené.

E kompania ta spera di por bula e avion atrobe den transkurso di e siman akí. E fin di siman akí e reguladó di aviashon Merikano, FAA, a anunsiá ku e avion 737 Max 9 mester a keda na tera pa inspekshon.



Apertura karnaval djabièrnè

KRALENDIJK -- Despues di a risibí e partisipashon ofisial di ta bini na remarke pa organisá karnaval 2024, Fundashon Union Ta Hasi Forsa (UNTAHF), a tuma algun siman pa hasi e diferente preparashonnan pa asina Boneiru por tin un selebrashon di karnaval 2024 grandioso. E promé evento programá ta apertura di karnaval djabièrnè awor na Social Café, ku aktuashon di entre otro Era di Kòrsou.

Un di e detayenan ku sigur a traha riba dje ta un ekipo fuerte pa den

tur sentido di palabra por karga e programa trahá pa kubri e periodo akí. Enbèrdat manera hopi tabata ekspresá i komentá kos tabata ketu, pero mester bisa ku simplemente UNTAHF a skohe pa traha un poko den silencio i pa awor ku tin detayenan mas konkreto pa drenta publisidat.

Konforme e programa, djabièrnè awor 12 di yanüari, na Social Café, tin e apertura ofisial di karnaval di Boneiru 2024. Manera ya anunsiá, e evento di apertura ta konta ku presentashon di DJ Veloz, DJ Ramsley Krips

i agrupashon musikal Payola di Boneiru i ERA di Kòrsou. Entrada ta general ta 20 dòler delantá i 30 dòler na porta.

Djaluna tabatin un evento chikitu na E Teras, a ofresé karchi di entrada na preis super spesial, esaki na rason di 15 dòler.

Durante mesun evento tabatin tambe oportunidat pa risibí informashon tokante e diferente detayenan di karnaval, entre otro di paradanan, elekshon di reina i prens ku pancho, prekario, etc.

9 di Yanüari 2024

"Señor ta lanta hende debil for di suela ..."
(cf 1 Sam 2,8)

Warda ku pasenshi riba Señor su respuesta ta un prueba ku hopi di nos mester pasa aden, si nos kier eksperiensia Señor su dibina providensia.

Importante ta pa nos perseverá, den nos orashon, súprika i obediensia na Señor. Den bista di hende, asta di esnan ku ménos lo bo por a spera, por parse ku nos ta hasi ko'i kèns. (cf 1 Sam 1,13ss) Sa ku esaki ta un asuntu entre abo i Señor, p'esei no preokupá ku prehuismo òf aparente sabiduria di hende. Ta esei Hana a hasi, ora saserdote Eli a menospresí'è, insinuando ku e tabata fuma. (cf 1 Sam 1,14) I Dios e rekompensá Hana pa su fe i konfiansa den djE. I Hana a duna lus na un yu. (cf 1 Sam 1,20) Konfia den Señor i buska pa deskubri Señor su plan pa bo bida i lo bo eksperiensia kon "Señor ta lanta hende debil ...!" (cf 1 Sam 2,8)

Danki Señor, ku di bèrdat Bo ta lanta hende debil fo'i suela.
(cf 1 Sam 2,8)

1L 1 Sam 1,9-20; Salmo 1 Sam 2,14-8;
Ev. Marko 1,21-28

005999-522-4056 Un Snechil Pan unsnechilpan

WINSON B.V.

ta buska

1 KOK - 1 help-kok

-mester tin mas ku 1 aña di eksperensia den kushina

Pa mas info yama # **795-2115**

HT-Boutique B.V.

ta buska

2 Winkel medewerker

-mester tin eksperensia den traha den winkel

Pa mas info yama # **795-2115**



Kas i edifisionan di antaño (9)

Den un seri di artíkulo riba djarsars BONERIANO ta dediká atenshon na e kasnan bieu di e isla aki, basá riba un estudio ku dr. Ank Klomp, antropólogo, a hasi masoméno 45 aña pasá. HET 'OUDE' BONAIRIAANSE WOONHUIS ta un estudio ku spesialmente awor ku e kas i edifisionan di antaño ta bou di menasa ta proba su importansia.

Otro tipo di kas

Banda di e tres tiponan di kas deskribí aki, na Boneiru tabatin tambe kasnan di tabla, anke no na un kantidat grandi. Un otro tipo di kas ta esnan di tabla batí ku bleki (lata) parti pafó. Tambe tabatin algun kas ku, anke no bibienda, tabatin arkitektura interesante. Ta tata di edifisionan públiko ku ku Ank Klomp a konsiderá bale la pena pa protehá, manera un edifisio ku tabata fungi komo depósito den Kaya Kòrsou.

E liña di heft tabata úniko. Pero mientrastantu e parti aki di e edifisio a dispersé. Un otro tabata e anterior tienda di Herrera Hermanos den Kaya Grandi. E edifisio aki si ta bon mantené ainda. Den restorashon no ta bai djis pa e kas i edifisionan interesante, sino tambe mester tene kuenta ku e besindario den kua nan ta situá.

P'esei tambe mester

inklú kuránan bieu i muraya den e restorashon, pa asina nan tambe keda mantené. Fuentenan ku Ank Klomp a konsultá ta muestra ku mayoria di e kasnan den estilo tradishonal na Boneiru ta konstruí den siglo pasá. Pero tin fuentenan ku ta indiká ku tin ainda basta edifisio na Boneiru ku ta konstruí for di den siglo 19.

Promé edifisionan

Un dje promé listanan di kas i edifisio na Boneiru ta di aña 1810. Riba e lista aki ta topa ku e siguiente deskripshon:

1 stro huis op Seroe Moreno

1 panne magazijn

1 stro huis op Fonteijn

1 dito daar de commandant in woont

1 dito daar de chirurgijn in woont

1 dito voor 't Hospitaal, zeer vervallen

1 dito daar de kapitein der slaven in woont voor

't Fort

Tin un lista tambe di aña 1824 ku e siguiente deskripshon di edifisio i kasnan di gobièrnu i nan balor patreas poné:

Het huis, Magazijn, Wagthuis in 't Fort (P. 2.000,--)

Een Magazijn aan de Rincond met pannendak (P. 1.500,--)

Een Huis naast het Fort waar den 1ste opzichter inwoont met pannendak (P. 800,--)

Een dito in het land waar de Chirurgijn inwoont met stroodak (P. 150,--)

Een dito waar de Chirurgijn ingewoont heeft, thans onbewoond (P. 30,--)

Een dito aan de Fonteijn op stutten met stroo bedekt (P. 30,--)

Een dito of Loots aan de oude zout Pan thans vereischt een nieuw Dak (P. 50,--)

E tempu ei un peso tabata bal masoméno fl.1,80.

Tambe tin un lista di

1828:

Het Huis in het Fort (fl.2,600,--)

Het magazijn op de Rinkon (fl.2.000,--)

Het huis bewoond door een chirurgijn (fl.200,--)

Het huis bestemd voor het hospitaal (fl.600,--)

De Huizen op de Fonteijn en zoutpan (fl.600,--)

'Pannemagazijn'

Ta resultá ku na 1810 tur lanthùis tabata ku dal di pal'i maishi, pues kas di bara. Kiko mester komprondé bou di 'pannemagazijn' ta ménos kla. Un depósito pa panchi, miéntas ku tur dak tabata di palu di maishi òf yerba asina? Pero e por. Kisas e panchinan tabata destiná pa e mangazina na Rincon, ku riba e listanan di 1824 i 1928 ta aparesé komo un edifisio ku dak di panchi.

No ta konosí ki dia presis a traha Mangazina di Rei na Rincon, pero esaki lo ta en todo kaso promé ku 1824. Esaki ta hasi'é, despues di Fòrti (Fort Oranje), e edifisio mas bieu di Boneiru. E edifisio grandi aki (masoméno 30 pa 7 meter) tabata sirbi komo lugá pa warda kuminda pa e katibunan. Na 1820 tabatin 321 katibu di rei


(di gobièrnu) na Boneiru.

Den un aña ku bon yobida tabata produsí suficiente alimento pa e katibunan na Boneiru mes, pero den un aña di sekura mester a importá maishi. Johan Hartog ta menshoná den su buki 'Bonaire, Van Indianen tot Toeristen', ku na kuminsamentu di siglo 19 produkshon di maishi chikitu (sorghum) no tabata importante na Boneiru i ku mester a importá esaki for di Kòrsou. Teenstra, un Hulandes Oropeo ku a skirbi un relato, despues di a bishitá Boneiru, ta skirbi ku "agrikultura no ta eksistí mes na Boneiru". E ta trese dilanti ku tin ménos maishi na Boneiru ku na Kòrsou. Banda di Mangazina di Rei banda di Rincon di tambe un Mangazina di Rei den Amboina. Pero Ank Klomp no tin un idea ki tempu a traha e edifisio di piedra ei. For di e listanan di edifisio poné ariba por konklú ku na 1828 ainda e edifisio aki no tabata konstruí. E promé bia ku ta menshoná Mangazina di Rei di Amboina ta na 1837, basá riba un relato skirbí pa Van Lennep Coster, kende a bishitá e plantashi Amboina masoméno den e tempu ei.

MONCHI & TONCHI

Tonchi, mi a lesa den BONERIANO ku hopi mas hòmber ku muhé a muri aña pasá.

Awèl sí. Mi ta bai pidi mi futuro tata pa traha mi komo muhé ora mi reen Karná.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com

aviso: avisobon@gmail.com

Wèpsait: www.extraboneiru.com

Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcedencia

Redakshon
Papi Antoin
Edson Pietersz
Ibi Piar (deporte)

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bò Antoin
786-6818

Aviso
avisobon@gmail.com

Nos ta selebrá Tempü Ordinario

Outor: P. Antonio Rivero, L.C.

Ordinario no nifiká di poko importansia, flou, sin smak, sin koló. Simplemente, ku e nòmber aki ke distingui esaki di e “tempunan fuerte”, ku ta e siklo di Pasku di Resurekshon i esun di Pasku di Nasementu ku nan preparashon i nan prolongashon.

mente, kumpli ku goso e Boluntat Santísima di Dios. Esaki ta e grasía ku nos mester muska i implorá di Dios durante e 33 simannan di Tempü Ordinario.

Krese. Krese. Krese. Esun ku no ta krese, ta wanta, ta bira malu i ta muri. Nos mester

di dos, for di despues di Pentekòster te na Atvènt.


Mi ta invitá boso pa probechá e Tempü Ordinario aki ku gran fervor, ku speranza, kresiendo den virtutnan teologal. E ta tempü di grasía i salbashon. Topa ku Dios den kada skina di nos dia. Basta di tin wowonan di fe pa deskubrié, no biba ku bista kòrtiku miopes i será den nos egoismo i problemanan. Dios ta bai na asa riba nos kaminda. I durante e tempü aki laga nos mira e Kristu apòstel aki, ku for di trempa ta resa na su Tata, i

despues durante dia ta dediká su mes hibando salbashon na tur hende, terminando dia na pia di su Tata, ku ta konsol’é i ta yen’é ku su infinito amor, ku e amor aki e dia siguiente nos lo komuniká den abundansia. Si nos no entusiasma nos ku Kristu apòstel, yen di forsa, di amor i vigor... Ku ken nos ta entusiasma nos mes?

Kristu, laga nos kompañá Bo durante e Tempü Ordinario akí, p’asina ku nos ta siña di Abo kon nos tin komportá nos mes ku bo Tata, ku otro nan, ku e akontesimentunan próspero òf atverso di bida. Nos ta bai ku bo, di ken nos lo tin miedu? Nos ke ta santu pa santifiká i elevá nos mundu.

krese den nos tareanan ordinario: matrimonio, den bida spiritual, den bida profeshonal, den trabou, den estudio, den relashonnan humano. Tambe nos mester krese mei mei di nos sufrimentu, éksito i frakasonan. Kuantu virtut nos por hasi den tur esaki! Tempü Ordinario ta kombertí asina den un gimnasia outéntiko pa haña Dios den e akontesimentunan diario, laga nos traha den virtutnan, krese den santidat... i tur esaki ta kombertí den tempü di salbashon, den tempü di grasía di Dios. Tur kos ta grasía pa esun ku ta atento i tin fe i amor!

E Tempü Ordinario ta ser dividí manera den dos “tanda”. Un promé, for di despues di Epifania i boutismo di Señor te na komienso di Kuaresma. I e



E ta e tempü mas antiguo di e organisashon di e aña kristian. I ademas, e ta okupá e parti mas grandi di aña: 33 o 34 siman, di e 52 ku tin.

E Tempü Ordinario (iglesia ta usa e koló bèrdè) tin su grasía partikular ku tin ku pidi Dios i busk’é ku tur ilushon di nos bida: asina manera den e Tempü Ordinario aki nos ta mira un Kristu ya madurá, responsabel dilanti di e mishon ku su Tata a konfia na djE, nos ta mir’é krese den edat, sabiduria i grasía dilanti di Dios su Tata i di hendenan, nos ta mir’é bai i bini, dediká bo mes pa kumpli ku Boluntat di su Tata, brinda su mes na hendenan... asina tambe den e Tempü Ordinario nos mester buska pa laga nos fe, nos speranza i nos amor krese i madurá i prinsipal-

Nifikashon di Epifania



Epifania ta nifiká manifestashon di Dios. Dios ta revelá su mes na tur hende: riku i pover, poderoso i humilde, hudiu i no hudiu. Despues di a nase El a manifestá su mes na e wardadónan, pero despues a manifestá su mes na magonan di oriente. Awe tambe E ke manifestá su mes den nos tur. Laga nos mira e enseñansanan ku e sucesos di e magonan ta duna nos p’asina ku Dios ta manifestá su mes den nos i atraves di nos den hopi otro.

1- “Nan a mira e strea”: En realidat tin hopi strea. Algun ta mira nan i otro nan no. E streanan por ta nos famia i amigu. Especialmente ta Iglesia en general ku esnan responsabel i ku tur esnan ku ke ta fiel na Señor. Nos por i nos mester ta strea pa hopi otro: ku nos palabra i konseho; pero prinsipalmente ku nos bon ehèmpel di bida.

2- “I nan a subi riba kaminda”: No ta basta mira e strea. Tin ku aktua. No ta basta sa e kaminda. Bo mester subi e kaminda. I esaki maske nos no sa e kaminda eksakto, manera a pasa ku e magonan. Laga nos ser kondují pa e enseñansanan di Iglesia.

3- “E strea a disparsé”: No tur kos ta fásil riba e kaminda pa Dios. Tin momentonan difísil, ku por yega na ser komo “anochinan skur”. Dios semper ta ku nos, nunca E ta bandoná nos. Nos mester sigui tin speranza.

4- “I nan a puntra”: Pa kontestá tin Iglesia i especialmente saserdotenan. Mester ta balente i konsultá. Por ta un katekista ku ta orientá nos den fe. Lo importante ta konsultá, ya ku Dios lo mira den dje un deseo di e bon. Maske bo puntra un persona robes, manera e magonan a hasi ora nan a bai serka Herodes pa konsultá. Pero Dios a hasi uso di e malu pa duna nan un bon kontesta.

5- “E strea a bolbe aparesé”: Dios parse ta manera E ta skonde. Si tur kos tabata masha fásil nos lo no tabatin mérito. Pero Dios semper ta terminá dor di konsolá esun ku sinseramente ta busk’é di kurason.

6- “I nan a haña Hesus”: Hesus mester ta e final di tur nos búskeda spiritual. Nos no ta bai tras di algun idea òf filosofia; Nos ta bai tras di un persona ku ta Dios ku a bira hende pa nos amor. I nos trankilidat ta ku nos lo por hañ’é. E ta prinsipalmente den Eukaristia. E ta tambe den esnan simpel, den esnan pover, den su Palabra, den e amor fraternal.

7- “I nan a ofresé nan regalonan”: Kiko nos lo ofres’é? Lo mihó ku nos por ofres’é ta nos kurason; pero, huntu kuné, tambe bos lo ofres’é nos trabou apostóliko, di moda ku nos por sòru ku al ménos un persona por aserká su mes un poko mas na Señor. Si nos ke simbolisá e donnan di e magonan, nos por ofresé e oro di nos amor komo e mihó ofrenda na Dios, sensia, ku ta nos orashon konstante ku ta elevá na shelu i mira, ku ta e aseptashon ku pasenshi di trabounan, sufrimentu i difikultatnan di nos bida.

8- “I nan a bai nan tera bèk via un otro ruta”: Esun ku berdaderamente a topa ku Hesus no por sigui e kaminda anterior. E mester kuminsá na biba dor di otro kaminda, e kaminda di hustisia, di pas i di amor.

Kisas la intenshon prinsipal di san Mateo, ora el a konta e sucesos di e magonan, tabata di eksponé, manera el hasi despues atraves di henter e evangelio, ku e mensahe di Hesus ta universal, ku e no ta únkamente pa un rasa òf un nashon, sino pa henter mundu. Ta p’esei na ora di rekordá e sucesos akí, Iglesia ta stimulá nos pa traha pa evangelisashon di tur hende. Esaki ta un dia misionero pa ekselensia, pasobra Hesus no únkamente a manifestá su mes na e hudiu nan, sino for di prinsipio a siña nos ku El a bini pa salba tur pueblo.

Pader Silverio Velasco

INVITASHON

“Felis ta esnan ku den Bo ta haña forsa, ku tin gana di kana bai Bo tèmpep.” Salmo 84

Ku sumo plaser **Grupo Hòmbernan di Fortalesa den Kristu** ta invitá nos hende hòmbernan na nos promé enkuentro di aña 2024.

Detayenan:

Fecha : djaluna 8 yanüari 2024

Ora : 7:30 p.m. (mitar di 8 anochi)

Lugá : misa Maria Auxiliadora (Sta. Maria)

Ruman, bin pa bo trese bo deseo- i anhelonan dilanti di Señor.

Komishon organisadó

ARUBA

Gobierno a inicia proyecto pa proteccion di beach

ORANJESTAD -- Loke sin duda ta di aplaudi ta e decision di gobierno y departamento di DOW, ta cuminsa duna mas proteccion na beachnan rond di e isla. Esaki a sosode na entre otro un sector cu ta hopi popular tanto pa habitantenan di Pos Chikito y Savaneta, esta e sector di beach unico na altura di Santo Largo.

Pa añanan largo a permiti cantidad di auto,

tanto di turistanan como hendenan local, subi riba e santo blanco bunita cu tin na e sector aki, cual a cuminsa afecta e calidad di e beach. Tambe durante e periodo di campamento, a staciona hopi auto riba e santo blanco loke awor ta bira imposibel despues cu DOW a pone barancanan grandi pa evita cu lo pasa cu auto y core riba e santo blanco.

Ta di spera cu e

maneho aki lo ser hiba na otro sectornan caminda chauffeurnan di auto no ta tuma na consideracion e daño cu nan ta haci na calidad di e sitionan aki, 'manchando' e color di e santo blanco pa loke Aruba ta conoci p'e internacionalmente y ta haci esaki un tipo di santo shinishi. Ta di spera cu e proyecto aki lo ser ehecuta tambe den e sector di beachnan den cercania di

hotelnan y tambe den e sector di Malmok y Arashi, caminda por mira hopi auto staciona riba santo blanco cu e beachnan ta provee.

Mirando e desaroyo turistico ta di vital importancia pa conserva loke ta e partinan importante di e isla, esta conservacion y proteccion di beachnan cu tin rond di e isla di Aruba.

Otro aspectonan cu tin urgencia di wordo atendi ta e calidad di careteranan rond di e isla, ya cu gran mayoria di careteranan rond di e isla, entre otro dilanti di hotelnan y otro sitionan turistico, ta conta c'un nivel di capa di asfalt yena cu lapi cu ta duna un aspecto ainda mas mahos cu normal.

Con gobierno lo bay atende cu e problema aki, ainda no ta conoci ya cu

no tin suficiente fondo den presupuesto 2024 pa cubri e gasto grandi aki.

Otro problema ta e asunto serio cu ta regarda e awa di riool den cercania y dilanti hotelnan grandi, cu pa algun aña caba ta un problema pero ainda gobierno no a soluciona esaki y ta muestra cu por lo pronto esaki lo no ta e caso tampoco.

Fuera di esaki tin e asunto di planta di purificacion di e planta di awa na Bubali cu tampoco lo conoce un solucion dentro di corto tempo. Sinembargo e decision pa proteccion di beachnan na Santo Largo, a ser bon ricibi den comunidad ya cu ta necesario pa esaki tuma luga mirando e balor pa tanto bishitante como hendenan local.



Pastoral Hubenil Noord ta felicita Kimberly Croes

ORANJESTAD -- Durante 2023 Pastoral Hubenil Noord (PHN) a tene varios actividad, e.o. tayer, presentacion, charla, reunion, motiva hobennan pa asisti na seminario, etc. y e hoben cu a sobresali mas cu su presencia na tur

e eventonan menciona ta Kimberly Croes.

P'esey diasabra 6 di januari 2024, despues di reunion, e grupo a bay celebra Aña Nobo y Dia di Tres Rey cu un lunch na Wendy's TL.

Aki directiva di PHN

a honra Kimberly cu un 'Certificate of Appreciation' cu su regalo concerni.

Parokia Sta. Anna y PHN ta felicita e hoben ehemplar aki pa su dedicacion y logro.

Masha pabien Kim.



A detene 11 chauffeur pa maneha bao influencia di alcohol

ORANJESTAD -- Departamento di Trafico y Unidad Motorisa a haci control prome durante y despues di Parada di Flambeau.

Departamento di Trafico a controla na comienso di e Parada di Flambeau y na unda a constata diferente vehiculonan cu no tabata tin nan documentonan na ordo como tambe un UTV.

Tambe e departamento Motorisa a bay controla na diferente partinan strategico durante parada. Total a detene 11 chauffeur di cual 5 a perde nan rijbewijs.

Controlanan lo continua durante e otro paradanan nos dilanti. Cuerpo Policial ta haci un apelacion un biaha mas pa no maneha auto bao influencia di alcohol.



KÒRSOU

Women's Steering Committee i klupnan afiliá a bini huntu

WILLEMSTAD -- Direktiva di Women's Steering Committee Curaçao (WSCC), huntu ku representantenan afiliá na WSCC, a bin huntu pa selebrashon di un Santu Sakrifisio di Misa na Santa Maria, pa yama Kreador danki pa un aña nobo den preparashon pa e di 50 aniversario di e organisashon.

E santu sakrifisio di misa tabata liderá pa Pastor Curtis Meris, kende ta Tata Spiritual di Women's Steering Committee Curaçao. Na inisio di e aña nobo, presidente di WSCC, Mirieta Lourens, na nòmber di direktiva e organisashonnan, a kompartí algun mensahe i tira lus riba puntonan ku den

punto di bista di direktiva di WSCC, ta rekerí atenshon. "Nos ta bin di un aña di hopi turbulensia i reto, tantu na nivel mundial, komo na nos isla mes. Situashonnan di hamber, pobresa, violencia, desaster natural i guera ku a eksigí bida di hopi hende i trese hopi fèdrít den famia. Den e aña nobo ku nos a drenta e puntonan aki lo sigui pidi atenshon."

Tin hopi kos ku no ta den nos man i ku nos no por influensia, pero e aspektonan loke ku nos por duna atenshon na dje i purba mehorá, nos mester hasi esaki. No solamente ku palabra pero mas tantu ku akshon, e presidente di WSCC a sigui bisa. Alabes nos mester uni mas den orashon i alimentá nos bida spiritual pa yega mas serka di nos Kreador.

"Riba ruta pa selebrá e di 50 aniversario di nos organisashon, por keda konta ku nos lo sigui organisá eventonan informativo i di interkambio

di idea. Tambe por konta ku nos lo sigui empoderá union i stabilitat den famia ku ta e pierda angular riba kua nos mester sigui edifiká nos pais. Banda di esaki mi ke bisa ku si nos tin kosnan di pasado ku ta pone ku nos relashon ku otro ya no ta dje bon ei, laga nos pidi otro despensá i rekonsiliá ku sinseridat pa asina nos por dirigí nos enfoke riba desaroyo. No solamente komo individuo, pero komo kolektividat. Mi sa ku nos por, basta nos ke. Ban traha huntu pa un meta komun. Un aña próspero pa un i tur," Lourens a bisa.



Akshon kontra okupashon ilegal i konstrukshon

WILLEMSTAD -- Tim di Toezicht en Handhaving di PTH, VVRP, huntu ku funshonarionan di Kuerpo Polisial, a tene un akshon na un tereno na Brakkeput. Motibu di e akshon ta ku a konstatá okupashon ilegal di tereno i kasonan di konstrukshonnan ilegal na e tereno akí. Den e akshon di tim, a aktua severo

kontra di ilegalidat akí, a konfiská diferente opheto i tambe polis a arestá un di e suhetonan ku tabata kometé e aktonan ilegal akí. Den e akshon a konstatá ku tambe tin hòrtamentu di koriente. A informá Aqualectra ku a tuma e medidanan nesesario i kuminsá un investigashon. Ministerio VVRP ta

bolbe advertí pa kuementu ilegal di tereno òf

konstrukshon sin pèrmit. Lo sigui aktua kontra esakinan

den estrecho koperashon ku Kuerpo Polisial.



STATIA/SABA/ST. MAARTEN

Akuerdo entre partidonan tokante ENNIA

PHILIPSBURG -- Dia 28 di desèmber 2023, Konseho di Minister di Sint Maarten a aprobá oficialmente e akuerdo marko pa e resolushon ENNIA, markando un paso krusial pa salbuardiá e bienestar finansiero di mas o ménos 30.000 asegurado.

E solushon integral akí, desaroyá den kolaborashon ku e gobièrnun di Kòrsou i Sint Maarten i Banko Sentral di Kòrsou i Sint Maarten, CBCS, ta garantisá kontinuidat di e servisionan di Grupo ENNIA, asta den e área di seguro di bida.

Den un komunikado di prensa di 20 di desèmber 2023, a informá públiko di e akuerdo marko na nivel tékniko aliansa pa e partinan involví. E problema predominante ku e akuerdo akí ta trata, ta e skarsedat supstansial di kapital na ENNIA, ku ta representá un menasa

signifikativo pa e stabilitat finansiero i derechonan di e aseguradonan. Sin un solushon viabel, e aseguradonan tabata enfrentá e perspektiva di redukshonnan supstansial den nan penshonnan, ku posibel konsekuensianan sosial i ekonómiko amplio.

E puntunan di atenshon di e akuerdo ta inkluí, un likidashon kontrolá di e derechonan i obligashonnan di e aseguradonan akumulá promé ku e regulashon di emergensia di yüli 2018 i un kontinuashon parsialmente di ECL pa e derechonan i obligashonnan di e aseguradonan akumulá despues di e regulashon di emergensia di yüli 2018.

Pa kumpli ku e obligashonnan di prestashon ku ta tumando lugá, e défisit struktural den balornan di ECL lo keda atendé en parti ku fondonan di e fondo di resolushon. Kontribushon anual na e

fondo di resolushon di e gobièrnun di Kòrsou i Sint Maarten pa 30 aña, pa un total di 30 mion florin i 2.3 mion florin anual respetivamente, komo fianza supordiná sin interes.

Tambe kontribushon anual di CBC pa 50 aña, pa un total di 15 mion florin pa aña. Un inyekshon di kapital den ECL di e fondo di resolushon, finansiá pa CBCS i garantisá pa e dos gobièrnun, segun e proporshon di aseguradonan ku ta biba na Kòrsou i Sint Maarten.

CBCS ta duna un liña di krédito na e fondo di resolushon, garantisá pa tur dos gobièrnun, den kaso

ku e kontribushon anual ta insufisiente pa kubri e défisitnan. Garantia ku no ta nesesario pa apliká un deskuento riba e pólisanan di seguro si ENNIA Caribe Leven N.V. (ECL), pa e aproksimadamente 30.000 asegurado.

E implementashon di e resolushon akí ta dependé

di aprobashon segun leinan i regulashonnan di Kòrsou i Sint Maarten. Garantianan i fiansan, lo ta asesora pa Cft i rekerí aprobashon di Parlamento.

Gobièrnun ta mantené su kompromiso pa mantené e públiko informá di e progreso i implementashon di e resolushon krusial akí.



WINAIR ta introdusí mas buelo pa St. Eustatius i Saba

PHILIPSBURG -- WINAIR ta bai agregá mas buelo pa St. Eustatius i Saba. Segun e kompania di aviashon, for di 15 di yanüari pasaheronan tin opshon adishonal pa biaha ora nan ta bai St. Eustatius i Saba.

Na promé instante ta agregá un buelo adishonal mainta, tantu Saba komo St. Eustatius, huntu ku un buelo adishonal den oranan di atardi pa St.

Eustatius.

E oumento di buelonan akí ta mehorá konsiderablemente e oferta di buelo pa e dos islanan.

Kuminsando 1 di aprel, ta introdusí un buelo adishonal tambe pa Saba den oranan di atardi. Ku e buelonan adishonal, pronto WINAIR ta ofresiendo kuater buelo diario, reforsando e konekshon vital entre St. Maarten, Saba i St. Eustatius.

Ademas e ekspanshon ta enserá tambe opshonnan pa bula stret entre Saba i St. Eustatius, un deseo di hopi habitante riba e dos islanan akí.

Segun WINAIR, e oumento di e orario di biaha ta kuadra ku e balornan fundamental di WINAIR pa ofresé eksperensianan di biahe mas kumbiniente, miéntras ta duna prioridat na satisfakshon di kliente.

Kandela na Sugar Hill Driver bou di investigashon

PHILIPSBURG -- Aproksimadamente kuartu pa shete di mainta dia 5 di yanüari, Kuerpo Polisial di Sint Maarten a risibí vários yamada informando di un kandela na Sugar Hill Drive na Cul-De-Sac.

E sentro di notifikashon di polis mesora a manda Brantwer i unidatnan di patruya na e sitio. Na yegada na e sitio, a opservá ku e di dos piso di e kompleho tabata completamente na kandela.

A tuma medida rápido pa sigurá e área i evaluá e situashon. Ademas di personal di Brantwer i Polis, tambe a manda personal di ambulans pa duna asistensia.

E aktuashon di e servisionan di emergensia a permití pa dominá a kandela rápido. Desafortunadamente e di

dos piso di e kompleho a sufrí daño grandi pa motibu di e kandela.

Dos persona a keda identifiká komo víktima di e insidente i atendé pa personal di ambulans. Ámbos víktima a eksperimentá inhalamentu di huma i a atendé na e sitio. Afortunadamente no a reportá mas malesa i ta spera ku ámbos individuo lo rekuperá completamente.

Kuerpo Polisial di Sint Maarten i Brantwer ta ehekutando un investigashon pa determiná e kousa di e kandela.


E sirkunstansia ku a konduzí na e insidente no ta konosí. Segun ku e investigashon ta progresá, lo duna aktualisashon na públiko pa garantisá transparensia i mantené un komunikashon habrí tokante e insidente.



DEPORTE

Red Stars a habri aña

Djadumingu 7 di yanüari, e ekipo di futbòl di Red Stars a habri aña 2024 i a yama tur mucha bon aña i deseá nan tur klase di éksito den e aña akí i pa e biahe pa Kòrsou pa kampionato di futbòl. Tabata un anochi hopi dushi pa e muchanan i nan ta yama Shon I Grill danki pa e sukulentu kuminda ku nan a kome.



Gesto di Cargill

KRALENDIJK -- E siman akí empleadonan di Cargill ta trese salu pa e turistanan na man. Esaki pa motibu ku e mashin ku ta hasi e trabou no ta den funshon. Pues un proseso kisas manera ántes tabata sosodé, e salu tabata transportá na man loke awendia ta sosodé ku mashin. Riba potrèt momentu ku empleadonan di Cargill a trese salu den hèmber, na e área kaminda turista ta kue salu pa bai kuné.



CS55 PLUS + *innovative*



special price
\$25,995



SERVICE & PARTS
GUARANTEED



5 YEAR
WARRANTY

/dabboussimotors

701.6463